



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

tiryimiyim@aolima

tir yimiyim

TAPAK 7

Govindas Konthoujam-i MLA & Congress nungi anenogo

Democracy atema US aser India nati longjemer inyaksüla: Blinken

VOL. XVIII NO. 285 (ADOK 285) DIMAPUR

YANBTEPNÜ (THURSDAY)

CHITENI (JULY) 29, 2021

₹ 5.00

Govt mapa inyaker tem Covid ajem agitsüba ozüing soita atar

Kohima, July 28 (TYO): Nagaland government mapa nung inyaker ajak Covid ajem agitsüla, aji mesüra ita sen magütsüsü ta tawa state government-i agitsüba ozüing ka tanü Gauhati High Court (GHC), Kohima Bench-i khen mapa kuma meinyaki alitsü atema soita yuogo.

GHC Kohima Bench osang ajanga angazükba agi, Nagaland Chief Secretary-i July 17 nü government mapa inyaker tem ajak Covid jem agitsüla mesüra anogo 15 shia RT-PCR, TruNat, mesüra CBNAAT ajanga tendanger Covid maliba kuli kaket bener arua sayutsüla, aji mesüra mapai marudaksüsü, anungji ita sen mangutsü ta agitsüba ozüing anema Public Interest Litigation (PIL) ka Dr. Aniruddha Babar-i okadak ken o benokba tanü angadanger, iba state government ozüing hopta ana sülen iba kasa ken o nung telemetba magütsü tashi mapa kuma meinyaki atatsü asoshi obendanger temi telemetba agitsü.

Nagaland nung Covid wara takok ngua nokdangtsü asoshi High

Powered Committee (HPC) on COVID-19-i July 16 nü telemetba agiba nung ajemdaker, Chief Secretary-i July 17 nü iba ozüing ya agitsüba liasü.

Chief Secretary-i department shia nung tekolak purtem nem agitsüba ozüing nung, ita shia Secretariat aser Directorate shia nung inyaker tem Covid ajem agiba aser Covid ali mali tendanga aser ita sen katiba osang ita shia anogo 15 buba tashi nungbo government nem metetdaksüsü ta agüja liasü.

Tanü okadak iba ken o obendanger temi angadanga mapang, state government tenüing nung jembir okatsüri Covid ajem agitsü ozüing anema benokba ken o ji tagizüka magizüksüla aser tangbo kecha tanga telemetba magütsüsü ta mepishia liasü.

Ajisüaka, GHC Kohima Bench nung obendanger ana- Justice Songkhupchung Serto aser Justice S. Hukato Swu nati iba ken o nung telemetba ka magütsü tashi government ozüingji mapa kuma meinyaki atatsü metetdaksü.

COVID-19 Nagaland: Nisung 114 dak putet & 2 asü

Kohima, July 28, 2021 (TYO): Bodbarnü Nagaland nung nisung 114 dak COVID-19 putetogo aser parnok züingsema nisung ajak agi 27,586 kumogo.

"Tanü nisung 114 dak COVID-19 aliba putet. Parnokji Kohima nung 37, Dimapur nung 30, Mokokchung nung 25 Tuensang nung 9, Mon nung 8, Peren nung 2 aser Kiphire, Phek o Zunheboto nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Tanü COVID-19 puteta alir nisung 75 taneptsü angu. Parnokji Kohima nung 29, Dimapur nung 14, Wokha nung 11, Tuensang nung 7, Kiphire nung 6, Longleng nung 4, Mokokchung nung 2 aser Mon o Phek nung kaka (1) lir. Parnok züingsema taneptsü angu 24,910 kumogo" ta paisa metetdaksü.

Nagaland nung COVID-19 nungi taneptsü angur 90.29% lir aser tang nisung 1,350 anepaludar, ta Dr Kikon-isa ashi.

Bodbarnü Dimapur nung COVID-19 puteta alir ana asüba

züingsema tasür ajak agi 552 kumogo, saka nisung 14 bo tanga tashidak ajanga asü, ta paisa shisem.

"Tang tashi nung COVID-19 alitsü akok ta temolung melemi bilemba sample 259,295 tendangogo. RT-PCR ajanga sample 102,263, TrueNat ajanga 67,308 aser Rapid Antigen Test ajanga 89,724 tendang," ta Dr Kikon-isa ashi.

"Mongulbar tashi nung Nagaland nung nisung 607,970 nem COVID-19 vaccine indang dose 752,858 agütsüogoo" ta State Immunization Officer, Dr Ritu Thurria ashi.

"Vaccine agirtemji frontline workers 60,733, healthcare workers 15,958, arishi küm 45 ser temapur 183,367 aser arishi küm 18 nung 44 tsüingda alir 347,912 lir" ta paisa ashi.

"Vaccine agirtem rongnung nisung 144,888-i dose anaprong agiogo. Parnokji frontline workers 38,888, healthcare workers 12,331, arishi küm 45 ser temapur 93,373 aser arishi küm 18 nungi 44 tsüingda alir 296 lir" ta ta Dr Thurria metetdaksü.

Assam-i rongsenketzung mokdangba agientsüla: Mizoram

Aizawl, July 28, 2021 (Agencies): Mizoram Home Secretary Pi Lalbiakangi-i Bodbarnep Union Home Secretary dangi Assam-i rongsenketzung mokdangba aser Bairabi Railway Station den sendaktepba train lenmangtem raksatsüba indang osang metetdaksüogoo.

Laisa, Centre dang Assam sorkari National Highway aser Railway line mokdangba agientsü atema mepishio.

July 26, 2021 nungi Assam sorkari National Highway-306 aser Mizoram den sendaktepba tanga gari lenmangtem shibangba melapoker, ta Home Secretary-isa ashi.

Külen, Assam nungi mejangjateta nisung kari Hailakandi district nung aliba Mohammedpur Railway Station aser Ramnathpur Railway Station nung train

lenmangtem raksatsüogoo. Iba ajanga Bairabi Railway Station, Mizoram den sendaktepba lenmang shibangtsüba kumogo, ta laisa ashi.

October 17, 2020 nungi November 11, 2020 tashi Assam-i Mizoram anema rongsenketzung mokdang dang nisungtem kanga timtemogoo. National Highway aser Railway line ajak Assam ajanga süiba atema Assam nung rongsenketzung mokdang, ta Home Secretary-isa ashi.

National Highway aser Railway line tem ya India sorkar meyong lir anungji state agency mesüra public-i noktangtsü temeten mali. Anungji National Highway o Railway line ajanga khu aser nisungtem senzüsü atema Centre-i Assam sorkar dang mokdang agientsü mepishir, ta Pi Lalbiakangi-i Union Home Secretary dang ashi.

Nagaland sorkari arrtsülen mapa inyaksüla: RPP 1972 Assam-Nagaland Interim Border Agreement agientsüla



July 28, 2021 nü Wokha district kübok Ralan Old village nung Rising People's Party (RPP) ketdangpurtemi Ralan tesem nung alirtem den ajurutepdang agiba noksa ka angur.

Dimapur, July 28, 2021 (TYO): Nagaland state sorkari Assam den arrtsütepa aliba tesemtem asoshi teinyaksü shitak meinyaker aser iba jagi arrtsülen aliba Naga nung kanga tim atemer, ta Rising People's Party (RPP)-i metetdaksüogoo.

Assam sorkaribo par sensotem atema arrtsülen terenlok mapa kanga inyaksür saka Nagaland sorkaribo kecha meinyaker ta RPP-i sasa bilemba olen ka ashi.

Bodbar nikonng dang RPP President Joel Naga-i anir ketdangpurtemi osangbenertem den sensaksem dang iba osang metetdaksü.

RPP teshimtet telok kati tanep Wokha district kübok Ralan tesem sem dang aser Ralan Old village nung iba temeket nung alirtem den ajurutepa senden ka amen. Parnokisa tanü Foothill Road

kübok Doyang apu yangludak semdanga liasü.

"Nagaland den arrtsüa aliba tesemtem nung Assam police aser CRPF-i nisung senzusenbongba dena azüoka lir. Talisa, Mokokchung district kübok Tzurangkong aser Wokha district kübok Ralan nung alirtemi alu mapa dena meinyakteter, kechiyong Assam police-i tenokdangbatem agüja lir," ta Joel Naga-i ashi.

"Küm aika Assam den arrtsüa aliba tesemtem nung Naga nungeri timtem jenti ajurua arur anungji Nagaland state sorkari kin mesüra party telemsa kecha melii mapa inyaksüla. Asenok Naga nungeri Assam nung den sobaliba aser putiotsü nung ajemdaker arrtsü shitak ladanga lir. Anungji Nagaland sorkari 1972 Assam-Nagaland Interim Border

Agreement ya agientsüla" ta paisa ashi.

RPP-isa Northeast state tem tsüingda arrtsü mangatettep alibatem angatetteptsü atema Nagaland sorkar dang North-Eastern Areas (Reorganisation) Act, 1971 meyipa reprangshia yanglushitsü ayongzükogoo.

Tanep RPP teshimtet teloki Wokha district kübok Foothill Road atema yangluba Doyang apu semdanga liasü.

"Nübertem asoshi kanga dang nungdakba Foothill Road ya yanglura, iba ya Naga nungeri takok indang otsü ka asütsü, anungji sorkari temolung agütsüsü. Iba mapa nung state sorkar, kin hohotem aser Naga nungeri ajaki shilem agitsüla" ta RPP-i metetdaksü.

"Ajisüaka, Doyang apu atema state sorkari 'expenditure head' yanglua mali aser iba ya taoksatsü osang ka lir. Iba ajanga state sorkari kechi inyaker ar memetetba sayur. Anungji state sorkari iba tongtipang lenmang atema temolung agütsüsü aser tekaratiba nung apu yangluzüksü atema yariteptsüla" ta RPP-isa ashi.

Nagaland nungi London-i Raja Mircha bener yokogoo

Kohima, July 28, 2021 (TYO): Bodbarnü Nagaland nungi King Chilly (Raja Mircha) seret 300 tashi London-i bener yokogoo.

Tanü bener yokba mersüji Peren district nungi liasü aser Radharani Vegetable Export, West Bengal o Kiega Exims Private Limited, Assam yaritepa bener yok. Iba mapa ya Agricultural and Processed Food Products Export Development Authority (APEDA) Ministry of Commerce and Industries ajanga inyaker.

Tanü online ajanga APEDA Director Tarun Bajaj aser Nagaland Agriculture Production Commissioner (APC), Y Kikheto Sema nati Nagaland nungi tayimtsü nung Guwahati adena London-i Raja Mircha bener yoka liasü.

"London-i Naga King Chilly belentsü atema Nagaland State Agricultural Marketing Board (NSAMB)-i APEDA Guwahati teyari agia mapa inyaker" ta NSAMB indang Chief Executive Officer, G. Ikuto Zhomomi-i ashi.

"Raja Mircha ya alima nung mersü tashitiba lir aser Nagaland nungi GI (Geographical Indicator) registration asüba tsünusenbongtsü mezüingbuba lir.

August 2008 nung Raja Mircha indang GI Registration süogoo" ta APC Y Kikheto Sema-isa ashi.

Raja Mircha ya alu nung aser atsu nung adokba tsünusenbongtsü ka lir aser international market nunga nisungtemi kanga sapur, ta paisa ashi.

"Nagaland nung tsünütetbatem ya mozü mamshii tsünütetbatem lir aser tang aluyimer 70% shi kati mozü kecha mamshii dang alu mapa inyaker. 2020 nungi alima wara ajuruaka Agri & Allied Department-i aluyimertem tetsükdaksü majurudaksüsü atema sendentem aika menogoo" ta Kikheto Sema-isa metetdaksü.

Nagaland nungi tangaleni Naga King Chilly (Raja Mircha), jiru, pingana, kiwi, zükolak, Naga züingi, entsülashi, rajma (kholar) amala tsünüteta bener yoktsü atema mapa inyaker, ta paisa ashi.

2017-2018 tsüingda Nagaland-i South Africa dangi Coffee (Cash Crop) bener yokogoo aser ibaji Land Resources Department ajanga repranger, ta APC-isa ashi.

Tanü Nagaland nung coffee alu 10,000 Ha shi ka lir aser 2030 tashi nung 50,000 Ha nung ayimtsü

alizüing lir. Iba ajanga alima Coffee Map nung Nagaland coffee densemstü, ta paisa metetdaksü.

"Nagaland nungi tangaleni tsünusenbongtsü bener yokba ajanga aluyimertem rongsenketzung tsütsü tajangzük angutsü aser sorkari akokba tashi yariteptsü renema lir" ta APC Y Kikheto Sema-isa ashi.

"Nagaland nung tsünütetbatem ano aika tangalen yoktsü atema tesentaktep yanglutsü" ta APEDA general manager U K Vats-ia tanü nangzük.

TNYF-i state sorkar dang mepelar Dimapur, July 28, 2021 (TYO): Assamese nungeri aser Assam police-i arrtsü adena ali atsünga agiba atema Nagaland sorkari mapa kecha meinyakba atema mepelar ta Tzurangkong Naga Youth Front (TNYF)-i tanü metetdaksüogoo.

Nagaland lushi telung nung mapa lemzüka aliba Assam police meindoktsü atema TNYF-i aiben Nagaland sorkar dang shiogo. Iba denji külemi Assam nungeri Nagaland ali atsünga agiba indang shiogo saka state sorkari kecha meinyaker, ta Media Cell, TNYF-i sangdong ka nung metetdaksü.

Opposition maliba sorkar aser Naga yimten sendaktepa mali: NPCC

Dimapur, July 28, 2021 (TYO): Opposition maliba sorkari Naga yimten latetba den tesentaktep kecha mali ta Nagaland Pradesh Congress Committee (NPCC)-i metetdaksü.

MLA temi süoki ia bilemer süra, parnoki menden nungi anentsüla mesüra council of ministers-i Governor nem shisatsü agüja yariteptsüla ta NPCC Communication

department-i sangdong ka nung ashi.

NPF, NDPP aser BJP-i Naga yimten tebilemstü yagi nübertem manisatsüla, kechiyong iba onük jembiba ajanga parnoki sorkar ketdangsubaren indang tongtipang onüktem amadokdaksüsü meranger, ta NPCC-i ashi.

Civil society telok kari opposition maliba sorkar pusemba indang

shiogo saka iba atema sasa bilemer, kechiyong democracy maparen nung tashitait opposition ka ajanga sorkar ketdangsubaren nung tongti shilem agir, ta parnokisa metetdaksü.

Külen, loktii opposition party aser parnok lennirtem sempaba tangatetba lira Naga nungeri asoshi democracy nungdak mali, ta NPCC-isa ashi.

Mokokchung nung World Hepatitis Day mungogo



July 28, 2021 nü CMO Conference Hall, Mokokchung nung "Hepatitis Can't Wait" omen nung ajemdaker World Viral Hepatitis Day amungba noksa nung angur.

Dimapur, Chiteni/July 28 (TYO): CMO Conference Hall, Mokokchung nung July 28, 2021 nü "Hepatitis Can't Wait" omen nung ajemdaker World Viral Hepatitis Day munga liasü.

Iba sentong nung Dr. R. Alemba Jamir, Medicine Specialist IMDH ya shisalen sayur ama arua shilem agia liasü aser Hepatitis ya virus agi adokdaksüba tashidak ka lir, koba agi temesen nung kongshir, ta ashi.

Pai ashiba agi, Hepatitis ya tabu pongu - A, B, C, D, E - lir aser item rongnung B aser C ya alima nung kanga bulua angur aser nisung südaksüba shilem 96 ya iba tabu ana ya ajanga lir.

2010 küm World Health Assembly ajanga Hepatitis ya Public Health problem ka ama agizük aser iba tashidak nungi nokdangtsü aser azüoktsü atema alima ayongzüka liasü.

Viral Hepatitis menatepa aoba anendaktsütsü, iba tashidak jenjang temelaba nung anepalutetsü, Public Health nungi Viral Hepatitis samadaktsütsü aser tasen menaloka aoba ajemdaktsütsü nükjidong nung 2015 küm Hepatitis ya Sustainable Development Goals 2030 nung inoksema liasü.

India nung Hepatitis agi timtem agütsüba ya tebilemstü

tulu lir aser IDSO ajanga tang iba tashidak wara asadaner, ta pai ashi.

Dr. Tamsuyanger ZLO aser NMHP ajanga iba sentong nung COVID-19 indang onük nung ajemdaker jembiba mapang, SOP aser guidelines sülen anidaktsü, tekeraba nung tendangtsü, teman anepalutsü aser mozü agitsü indang jembiba liasü.

Iba sentong nung Olemienla FWA menden liasü aser Alimayang Computer ajanga tepela ankep o jembiba. Iba sentong nung AKM, NSRLM, NHM, IEC personnel aser CMO staff tem dena liasü.

CAPF-i Assam & Mizoram arrtsü anüktsü

New Delhi, July 28, 2021 (Agencies): Bodbarnü Ministry of Home Affairs (MHA)-i ayonga amenba senden ka nung Assam-Mizoram arrtsülen neutral central force mapa lemjüktsütsü telemteba agiogo.

Union Home Secretary Ajay Bhalla menden ser ghonda ana

shi senden amenba sülen iba telemteba ya agi. Senden nung Assam Chief Secretary Jishnu Baruah aser Director General of Police Bhaskar Jyoti Mahanta aser Mizoram Chief Secretary Lalnunmawia Chuaungo aser Director General of Police SBK Singh

nungertem aden. National Highway 306 anasa state ana tsüngda mangatetep aliba tesem nung Central Armed Police Force (CAPF) mapa lemjüktsütsü atema state sorkar anaprongi molunga agizükogo, ta home ministry ketdangtsür kati ashi.

NSCN/GPRN (R) ajanga Naknyulem benjong salem lemsatep

Dimapur, Chiteni/July 28 (TYO): NSCN/GPRN (Reformation) ajanga Chang Naga nung den Naknyulem benjong salem lemsatep, koba July 29-31 tsüngta amunger.

Naknyulem ya Chang kin asoshi tongtipang benjong ka lir, koba tembar tesendaktep tajung

temaitsü lir, kong nüburtemi sempet aser chiyongtsü lemsatep. Iba benjong nung akhi tetsütebou mapang asayaba saisapong asayar aser tetsürtemi Kongkhim atemer.

Chang nungertem ya tasü tait aser tangatetba nung tashi tulu aser kanga tongmelang lir. Iba

benjong ajanga Chang nung adianu aser adianutsürtem takum nung tajung atalokjang aser maneni yimjung aser telungjem asoshi lenir südakjangma, ta NSCN/GPRN (Reformation) indang MIP (Ministry of Information & Publicity) sangdong ka ajanga ashi.

Security Forces temi yi aser temesepba mozü ayoker apur



Dimapur, Chiteni/July 28 (TYO): Security Forces temi police den lungjemer Full Nagarjan, Dimapur nung July 26, 2021 nü ozüing alema yi bena alir nisung ka pua liasü.

Osang tejangja kar nung ajemdaker Security Forces temi state police den lungjemer operation ka agiba mapang Full Nagarjan, Dimapur nung nisung ka pua pa ket nungi sen lakh 4 jenjang yi pua liasü.

Pua alisang den pa ket nungi ngutetba oset ya maneni asüngdangyatsü atema East Police Station, Dimapur nem agütsüogo.

Maneni Security Forces temi police den lungjemer July 27, 2021 nü Zeizou village, Kohima nung ozüing alema temesepba mozü ayoker nisung ana pua liasü.

Iba yimtsüng nung police den lungjemer operation ka agiba mapang security forces temi temesepba mozü ayoker ana apu

asertena ket nungi sen 42,350 jenjang aket mozü (cough syrup) bottle 149 aser SPM capsule 2149 den 7.62 & 9mm prangbong indang injang ana, 9mm indang FCC ana aser bike ka ngutetba liasü.

Iba ken o maneni bushisüngdangtsü atema pua alisang nisung ana den tena ket nungi ngutetba osettem ya Zeizou Police Station, Kohima nem agütsüogo.

NLA Session atema Pass agütsütsü

Dimapur, Chiteni/July 28 (TYO): Commissioner & Secretary, Nagaland Legislative Assembly, Dr. P.J. Antony ajanga sangdong ka nung, August 3 aser 5, 2021 anogotem agitsü aliba 13th Nagaland Legislative Assembly indang Eighth Session atema Car Passes aser Official Gallery Passes ya July 31, 2021 nungi agütsütsü, ta metetdaksü.

1) Ministers, Advisors aser AHODs ajaki Car Passes aser Gallery Passes ya Special

Secretary (Home), Civil Secretariat, Nagaland, Kohima nungi meshitsü akok.

2) MLAs aser NLA züngsem indang P.S/ P.A temi Car Passes ya Reception Counter Gate No-II, Nagaland Legislative Assembly Secretariat nungi meshitsü.

3) HODs, IPR aser Media Persons ajungai parnok indang Car Passes ya Reception Counter, Gate No-I, Nagaland Legislative Assembly Secretariat nungi meshitsüla.

DC Office nung aonung gari anena mayutsü: DC Kohima

Dimapur, Chiteni/July 28 (TYO): Deputy Commissioner indang Office Complex, Kohima nung tim ketdangtsür nungi temelaba melie aonung gari anena ayuba August 1, 2021 nungi tenzüka memelar, ta Deputy

Commissioner Kohima, Gregory Thejawelie, NCS ajanga sangdong ka nung metetdaksü.

Temelaba melie iba tesem nung gari anena lira, shia aliba anogo nungi tenzüka atsür aotsü, ta sangdong ajangasa ashi.

Trinity School ajanga HSLC Top 1 jenjang ngutetla tushi



Keneino Thorie-i July 28, 2021 nü Trinity School Kohima nungi sen lakh ka agizükba agizükba noksa nung angur.

Kohima, Chiteni/July 28 (TYO): Trinity School Kohima ajanga HSLC 2021 tatidang nung tematiba jenjang (Top 1) ngutetla, Keneino Thorie nem tenüngsang aser tetushi agütsüba sentong ka July 28, 2021 nü agia la nem kuli kakat den sen lakh ka agütsü aser school nung aliba kakatshir ajak indang ita shia menokba saru nungi khen atema sen 100 ajemtsü sangdonga liasü.

2003 küm "Labour Knowledge Wisdom" omen nung ajemdaker Trinity School ya Dairy Farm, Lerie nung amenoka liasü.

Thorie-i taküm agiba High School Leaving Certificate tatidang nung marks shilem 98.50 ngutetla state nung tematiba jenjang ngutetla liasü.

Nagaland Board of School Education ajanga agiba 2021 HSLC tatidang nung iba school nungi kakatshir 35-i takok ngua liasü.

Bodhbarnü school auditorium nung takok angur nem tenüngsang agütsüba sentong ka agiba mapang school-i Keneino Thorie nem sen lakh ka indang cheque agütsüba liasü.

La nem ano ajak madak tematiba jenjang ngutetba temaitsü (Mayangnokcha Award for Academic Excellence) sen 25,000 aser social science nung tematiba jenjang ngutetba atema (Youth Resources & Sports department ajanga sponsor asüba MAT-YRSD Award) sen 5,000 amokja liasü.

Ano maneni iba school nungi HSLC nung marks shilem 80 dak tema ngutetla kakatshir pezü tushia liasü. Parnokji Oniitsolii Tiinyi (92.66%), Mantosh Kumar Dubey (88.16%), Chetcala Thapa (87%) aser Md. Ezaz (84.66%) alitsü.

Iba sülen Keneino Thorie ajanga alakteta takok ngutetba atema akum agütsü Trinity School nung azünger kakatshir ajak dang it aka fee nungi sen 100 adoktsü sangdonga liasü.

Kasa sentong nung school

nungi Keneino Thorie tsürabur, tesayur ajak, school staff aser HSLC tatidang nung takok angur ajak nem sempet agütsüba liasü.

"Pokpaa jembiti, HSLC tatidang nung tematiba jenjang ngutettsü ya imla meliasü aser kü takum nung bilema meliasü, saka maneni meranga inyakba, temolungtetba aser tezü tanga malibayong takok ngutet, aser ajak dang tongtipangtibaji Tsüngrem tematiba nung yutsüba aser Pa nem bendanga agütsüba ajanga lir," ta Keneino Thorie-i takok anguba otsü lemsatepba mapang ashi.

Trinity School tenüng ajungkettsütetba ya temoatsü ka ama bilemer, ta lai ashi.

2020 küm kodanga majangshidangba tensa ajura tashidak wara ya kakatshirtem asoshi kanga majung liasü, saka tesayurtemi temolung aser tanüla ajunga agi asenok dang lesson sayua liasü, ta lai ashi.

Tesayurtemi meranga sayuba atema pelaba lemsatepba mapang, mapang shia test aser tatidang agiba nungi teyari angu aser board tatidang atema kakatshirtem tali tajungba renemshidaktsü, ta ashi.

Tsüraburtemi tatem makai meima yariba atema pelaba lemsatepba liasü.

Thorie-i kilem kakatshirtem dang ajemalua alitsü aser tajangshiba balala ajurutsü renema alitsü ayongzüka liasü.

Keneino Thorie-i takok anguba ya rongsen ka ama mapang talangka alitsü, ta Trinity School Kohima indang administrator, Kevin Solo-i ashi.

Iba sentong nung Trinity School headmaster, Mathew Tsathong-i salem aben aser Oniitsolii Tiinyi ajanga tepila o jembiba liasü. Mhaphruonuo Rutsa-i temeja ken ka aten aser Keneino Thorie tebu Kuolhoulie Thorie-i sentong nung adenertem ajungshia liasü.

Iba sentong nung Trinity school headmistress Susan menden liasü.



Bodbarnü Hailakandi jila shibanger aliba noksa nung angur. Mizoram Police-i Assam Police aser civilian dena nisung 6 tepsetba anema Barak Democratic Front (BDF)-i Barak Valley kübok district asem- Cachar, Hailakandi aser Karimganj nung ghonda 12 shutdown allitsü ayongzüka liasü. Bodbar anepdang 5:00 ako nungi nikongdang 5:00 ako tashi shutdown takok ngua agiogo. (Hailakandi, July 28)

Ripun Bora-i Amit Shah dang senden ka jazüktsü ayongzüker

Guwahati, July 28, 2021
(Agencies): Assam sorkari Congress telok ka Assam-Mizoram arrtsü semdangi meyokba sülen taoba Assam Congress president Ripun Bora-i Amit Shah dangi shidi ka zülüogo.

"Assam-Mizoram arrtsü mangatetep tuluka kümogo aser iba atema party ajak senden ka amentsüla" ta Bora-i Shah dang ashi.

"Arrtsülen Assam aser Mizoram police tem raratsü tia ka nung lir aser ano nisungtemia ozüing alema inyaksü akok" ta paisa ashi.

"Tensa tajungba

mekümdaktsüra state anaprong nung tensa tamajungba akümtsü aser iba ajanga Northeast state ajunga dak kongshitsü. Anungji ni nü dang Assam aser Mizoram nungi Chief Minister tem dena Northeast state tem nungi Political party ajak külem senden ka Prime Minister tsüngdang amentsü asoshi jazüktsü ayongzüker" ta Ripun Bora-isa metetdaktsü.

Assam Pradesh Congress Committee (APCC) president Bhupen Borah-i anir Congress teshimtet telok ka arrtsüleni aodang Cachar police-i parnok noktang.

Dhulia police station anasa

Cachar administration-i parnok noktang ta MLA Debabrata Saikia-i ashi.

Congress-i district administration dang parnok Lailapur police station tashi aotsü atema mepishi saka temelaba magütsü, ta paisa ashi.

Onoki Assam aser Mizoram sorkartem dang arrtsülen tensa süngjemdaktsütsü ayongzüker, ta Saikia-i ashi.

Cachar district Superintendent of Police (SP) inyaksü atema tang tasen shimba Ramandeep Kaur-i ashiba agi, arrtsü anasa tensa mejungi lir aser CRPF indang company 3 mapa lezmüktsüogo.

I-PAC telok atema TMC lennir Abhishek Banerjee-i Tripura semdangtsü

Agartala, July 28, 2021
(Agencies): Senior Trinamool Congress (TMC) leader - Abhishek Banerjee will arrive at Agartala in Tripura on Friday.

Trinamool Congress (TMC) lennir Abhishek Banerjee-i Hokolbarnü Agartala-i arutsü.

Prashant Kishore'er I-PAC telok pua aliba anema lungkak aitba sentong nung shilem agitsü Abhishek arutsü.

Iba osang ya Bodbarnü Tripura TMC president Ashish Lal Singh-i metetdaktsü.

"Tanep 10:00 ako meta TMC lennir kar Agartala tongogo. Ni parnok airport nung



Abhishek Banerjee (File photo)

arutsü" ta Tripura TMC president-i ashi.

"Dharmanagar nung ozü party züngsemtem tanü police-i azük. I-PAC telok apuba anema lungkak aidang youth wing president aser district president dena police-i party züngsemtem dak azük" ta paisa ashi.

Tripura Police-i poll strategist Prashant Kishore indang I-PAC telok anema FIR ka benokogo aser parnok Agartala hotel ka nung puoka lir.

Tripura Police-i I-PAC telok nung züngsem 23 nem summons agütsüogo.



Arunachal Pradesh kübok Tirap District nung sepaitem den Arunachal police-i NSCN-K (YA) züngsem ana apu. Parnoki Sinnu-Raho yimtsüing nung mita aodang telungpur anaji apu aser tena ket nungi .32mm Pistol 2 den magazine, 9mm indang round ka, 7.62mm indang round 5, point 32mm indang round 13, 1500 gm IED, electrical items, sen meshiba shiditem, Opium gram 300 aser Rs 7000 ngutet. Tenaprong den apuba oset ajak Lazu Police Station ket nung agütsüogo.

Mizoram CM Zoramthanga-i yimjung alitsü ayongzüker

Aizawl, July 28, 2021
(Agencies): Assam den arrtsü mangatetep adoka liaka Mizoram chief minister Zoramthanga-i nisung ajak dang süngjema alitsü aser yimjung yanglutsü mepishiogo.

"Iba ama mapang tamajung ka nung nisung ajaki tensa süngjemdaktsütsüla. Centre sorkar teyari ajanga Mizoram-i

iba ken o angatetteptsü imlar" ta Zoramthanga-isa ashi.

Zoramthanga ya tang quarantine nung lir kechiyong pa indang PSO ka dak COVID-19 putet.

Yashi Zoramthanga-i lendong atalokba tesem semdangtsüba liasü saka COVID-19 putetba ajanga quarantine asütsüsa aküm.

Meghalaya-i Assam arrtsülen police outpost lapoktsü

Shillong, July 28, 2021
(Agencies): Meghalaya sorkari Assam den arrtsülen police outpost tem lapoktsüba osang metetdaktsüogo.

State sorkari police outpost lapoktsü atema tesem aika shimogo, ta Meghalaya chief minister Conrad Sangma-isa ashi.

Ajisüaka, Assam-Meghalaya arrtsülen ashishitep aketba tesemtem nung Assam sorkar den jembishinüba sülen ang police outpost tem lapoktsü,

ta CM Sangma-i metetdaktsü.

Ajisüaka, ashishitep maliba tesemtem nungbo outpost tem lapoktsü, ta paisa shisem.

"Meghalaya nung Ri Bhoi district kübok Longkhuli nung aser Assam Police tsüngda raratepba indang onük ni Assam CM Himanta Biswa Sarma dang shiogo" ta CM Sangma-isa metetdaktsü.

"Ni Assam Chief Minister den jembigo aser künaprongi tensa meraksatsüla ta lemteog" ta pai ashi.

Govindas Konthoujam-i MLA & Congress nungi anenogo



Govindas Konthoujam (File photo)

Imphal, July 28, 2021
(Agencies): Manipur Pradesh Congress Committee (MPCC) president mapa nungi anenba sülen anogo ishika lir Govindas Konthoujam-i Manipur Legislative Assembly (MLA) menden nungi anenogo.

Konthoujam ya Bishnupur nung kümsük trokben tashi MLA lir aser pai party membership nungi anenba ajanga Bharatiya Janata Party (BJP) nung adentsü akok ta bilemer.

Konthoujam-i BJP nung madentsü ta MPCC-i shiogo saka osang angazükba agi pai Congress Legislature Party (CLP) leader indang mapa

lemzüktsüba atema temolung masür.

Konthoujam-i tanü anüngdang Manipur Legislative Assembly speaker Khemchand Singhnem nem resignation shidi agütsü.

Paisa MPCC interim president Nameirakpam Loken nem INC indang primary membership nungi anenba shidi agütsü.

July 20 nü Konthoujam-i MPCC president nungi anenba shidi agütsü. Konthoujam-i taoba mapang Cabinet minister inyakogo aser yaküm December ita Sonia Gandhi-i pa MPCC president inyaksü shima liasü.

Goalpara nung Mahatma Gandhi indang kürakyanglu raksatsü

Goalpara, July 28, 2021
(Agencies): Assam kübok Goalpara district nung mejangjatetba nisung kari linük tebu Mahatma Gandhi indang kürakyanglu ka raksatsüogo.

Goalpara jila nung BOC point nung iba kürakyanglu ka lir aser iba ya küm 20 tejakdang yangluba liasü.

Iba tatalokba ya Criminal Bureau of Investigation (CBI)

nem bushisüngdang südaktsütsüla ta nisungtemi takhangba agütsür.

Iba tesem nung mapang shia ozüing alema inyaksangshir saka Closed-circuit television CCTV cameras enoka maliba ajanga nisungtem meputeter, ta iba tesem nung alirtemi ashi.

Parnokisa CCTV cameras enoktsü takhangba agütsüogo.



TIR YIMYIM YIMOBILEM (EDITORIAL)

DIMAPUR YANGTEPNÜ, CHITENI (JULY) 29, 2021

ILP akangshitsüba mapang

Covid wara aliba agi inyaksangshi mesadem Nagaland nungia tsümartem aika pei lima bushia ogo aser joko mapang talangka asen lima tesem tesem nung hopta nung khen Assam len nungi tsümartem anir atua hopta shia anogo ka bazaar mena aliba sobaliba toa anenogo. Item kisung jagi asenok kibong shia nung asenoki memeteti sen aika kumzuka alitsü. Joko, asenok aika aonsutsü ayoker kumogo aser akhidang tsümartemi inyaka aliba mapatem aika asenoksasa inyaker. Itemji asenok asoshi tebilemtsü agi aleper agütsüba temoatsü amato asenoki agidi. Iba ama mapang ya asenok loktiliba aser yimten nung akangshitsüba mapa aika lir aser item rongnung tongtibang mapa kaji, Inner Line Permit ya asütsü. Asenokbo Nagaland makumdangyongi ILP ya Naga lima bendangertem ket nungi kumzuka ayutsü asoshi amshia aru, saka asenok azümasenba dang masü saka asenoki dokan aser hotel tilaka lapoka amena mashi aser süngküm tongnü amshia süra ki asüba dak alaka longru (bricks), cement, lisem aser kojol amshia kiojen yanglua mashi, anungji asenok asoshi tangar mapa inyak ashirtem teyari kanga nungdaka liasü aser tanüa nungdaker. Aji oda, bendangertem asen lima nung teimba teimba arua aliba ya kazüa amongtsü aruba masü saka asenoki parnok item mapatem asoshi nungdakba agi aruba lir. Tetezü, parnok medeni asenoki meinyaktetsüba mapa aika lir, anungji parnok kenyongi asen limai marudaktsütsü mesüra melidaktsütsü ta masü saka asenoka bendang limai aotsü aser bendangertema asen limai arutsü, saka bendangertem asen limai aruba agi asenok makoksatsüsa asenok kanga wainshin meteta alitsüla. Iba tangatetba nung, alemli asenok kecha memetet shiruru ama aliba mapang British nungertemi Naga limaibo temelaba magii bendanger shinga aotsü memela aser iba kasa ILP özüng, koba dang Bengal Eastern Frontier Regulation 1873 ta ajar, iba özüng ya Nagaland state akümba mapanga akangshia renema ayu. Iba ama asen lima aser nübortem bendanger ket nungi kumzuka ayutsü asoshi tangar temeteteterteri dena kanga temulung agüja lateta yutsüba özüng ya asenoki kanga süoki ia agitsüla aser mapa kuma inyaksüla. Asen lima bendangertemi amokbangtsüba lendong nungi kumzüksü asoshi ILP özüng ya sepai meyerijang aika arütsü nüka ayuba dang nungi tongtibangba aser tashi taitba lir. Nagaland nung ILP amshiba nükhia repringba agi, Manipur nungertemia parnok state nunga ILP amshitsüla ta kanga sashia nokdakba agi center government-i Manipur nunga yaküm kum nungi ILP amshitsü temelaba agütsüogo. Aji oda, Manipur nungbo ILP amshiba ita nungi tenzüka bendangertem nungi ILP fee agütsüba nung government senpongi sen crore aika arur. Iba kasaji Nagaland government senpongia arua alitsü imlar. Joko, Northeast nung Assam dak alaka ILP mamshiba state-ji Meghalaya dang anünga lir. Tan India kilo kilonser Amit Shah Shillong nung arua amongba mapanga, Khasi Students' Union purtemi anir pa ajurua Meghalaya nunga ILP amshitsü melatsüla ta takangba nenshia metetdaksü saka Amit Shah-i kecha melangzü. Tetezü memelunger asütsü. Joko, Covid wara mopong ya terabo süitema aoer amai repringtetter, anungji akhi ama Nagaland nunga akhi alu mapa tenzüksü. Idangji, akhi ama asen mapa inyaksü atema bendanger aika nungdaksü, anungji parnok tanaben Nagaland bushia marudangyongi Nagaland nung ILP amshiba maparen ajak akangshir atatsüla. Tangbo Dimapur nunga dena ILP amshitsü state sorkari telemtetba agia lir, anungji Dimapur nunga ILP özüng ya komaser takok ngua amshia otetsü ta asüba inyakyim tasen kar bendenloka latetsü nungdaksü. ILP ya tapu aika nungdaksü. Ashiko, government mapa inyaker atemabo government service Identity Card-ji ILP ama amshia akok, saka lulena senzütsü purtem asoshi asüyonga, ita junga monga mapa inyaka amongtsü purtem asoshi asüyonga mesüra private mapa nung tesayur aser tanga mapa inyaker asoshi asüyonga, parnok mapa apir, parnok nemji ILP den mapang tasazük ka asoshi "Work Permit" agütsüla. Iba amaji, kodang asenoki ILP inyakyim ya akangshiba dang masü saka bentetbenteta mapa kuma amshidir, bendangertema timtem melii arutetsü aser asenoka parnok nungi teyari angutsü. Aji oda, iba ILP inyakyim benteta inyakba ajanga bendangertemi lisopurtem amokseptsüba lendong nungia kumzüksü aser ILP fee agiba ajanga government senpongia melemtsü.

OLEMSABANG

KIBONG KA TIA MAKATIBA AMA ASER KHRISTAN TEM TEIMTEM AJAK AREMTSÜ JABASO KA AMA

~ I. Imdang Ozüküm, Er. Retd

1. Khristian ka ji ajak aremzüksüba aser reshikangshiaka tatok agitsütsüba.
 2. Alima nung Khristian temi tangar tepsetba mangutsü, aser akoktsü suaka odang aremzükteusa akümer. Kechiyong Tsünrem o khristiantemi amshitsüsa akümer.
 3. Khristiantemji San (Sheep) ama lira ser san dakji tamajung mulungsentsü maka aser temeimtsüka aser teti parnok tanishibai kechi ashir aji dang angar, aser tanishisangi aniba leni dang aotsü, iba den kesa Alima nung Shidakba khristiantemji lir.
 4. Alima nung Yisu marudang nungi Khristiantemji reshikangshi aser tetepsetba yimya palala agi khristantem tepset. Danga asenoki ngua yamaji tepseter aser tepsettsü, kechiyong Yisui ashiba ama Kü tenung nung nenok reshikangshitsü aser tepsettsü. Asenok Khristiantemi aji meteta dang Yisu Khrista amanger.
 5. Laishiba nung shia aliba tatem anogo nung tataloktsütem aika ataloka arur aser asenoki arokaroka mepilemdanger. Noha putu ama Mathew 24:37-39, Aser Noha tensa koma liasü yamaji nisung chir aruba alitsü, kechiaser Tsümetsüng matongdang aser Noha Rongi matu tashi parnok koda chionga aser juma anioka aser kiba kei yoka liasü, saer Tsümetsüng arua parnok ajak okshia bener mao tashi parnoki memetet, yamaji nisung chir aruba alitsü.
- Laishiba nung Shia aliba tatalokbatem kar Yamai**
6. Amos 8:3, Iba anogo nung Tenla kidang kentenbaji asatepba ola ka dang akümtsü ta Kibuba Tsüngremi ashir, tasü mang jenti alitsü, tesem aisu nung parnok ola matoki merepshitsü:
 7. Amos 8:8, Iba Asoshi alii-I matententsü aser Yangji aliba nisung shiai mang mayimtsü no?
 8. Amos 8:9-10; Aser iba anogo nung anjong tenaridang anu ludaktsütsü, aser anungdang ni alima manga kümdaktsütsü, ta Kibubai ashir, (tekong 10) Aser nenok penjungbentsü agi mangyimba kümdaktsütsü, aser nenok ken ajak temenungra ken kümdaktsütsü aser nenok teperem nung ni anumsu kangdaktsütsü, nisung shia lemstsü kümdaktsütsü, aser jabaso ka dang aliba asoshi mang ayimba ama aser iba tatem bangji takoanogo ama ni kümdantsütsü,
 9. Amos 8:11, Ajiang linuk nung aya wara ka chi makaba mesura tzü tzüraba wara ka masü, saka Tsüngrem o mangashiba wara ka ni yoktsü anogotem arudar. ta Kibuba Tsüngremi ashir,
 10. Amos 8:12, Aser parnok tzüyim nungi tzüyim tashiaser anuolentip nungi anutoklen tashi numzüksü, Tsüngrem o pushitsü, parnok oli aruli ta asemteptsü saka aji mangutsü. Tsüngrem o shinur saka meshiteter. Anganur saka tashir mali.
 11. Amos 8:13, Iba anogo nung tepur tajung aiurtem aser asangurtem tsüraba agi lulatsü;
 12. Jeremiah 16:9 Kechiyong temeranger Israel Tsüngremi yamai ashir, ajiang ni iba linuk nungi nenok nukdang aser nenok tendak menushishiba ola aser pelatepba ola aser kiyimsang ola aser kiyimla ola ni anendaktsütsü,
 13. Jeremiah 16:4 Tasütsü tashidak tulu agi nenok asütsü, parnok mang mayimtsü, mesura parnok maremtsü, parnok ali tema nung jana ama alitsü,
 14. Jemeriah 16:5, Kechiyong Kibubai yamai ashir mangyimba kidangi tetu, mesura ajebtsü tetu, mesura parnok mangteyim. Kechiyong iba nubur nungi Kü tesunep oda temeim yimlipilem aser tauchi ni bener ogo ta Kibubai ashir.
 15. Jeremiah 16:6, Iba lima nung tulu tila anaprong asütsü, Parnok maremtsü, mesura nisungtemi parnok asoshi ma mayimtsü, me3sura parnok sasa maleptsü, mesura parnok asoshi tekolak mesutoktsü,
 16. Jeremia 16:8, Benjung kidangi parnok den amentsü, achitsü, ajumtsü nai maittsüla.
 17. Isaiah 26:20, Arung, Kü nubur, na nu takdangi iang, aser nu madang kishi ayupangang: ain atokba sua mao tashi nu sasa kenpika atokdaktsütsü, aser joko pai tepsetba memiimtsü.
 18. Isaiah 2:11, Azüklen talang nung repringba nisung teküpoki ludaktsütsü, aser nisung mezümekümba mechioka aludaktsütsü aser iba anogo nung Kibuba dang ajungkettsü.
 19. Exotus 30:18-21, Kodang parnok sentep suki jagi idir mesura parnoki tenzüksü atema tenladak anasa arua, mi agi Kibuba dang tarungba tenla agütsüdir, parnok masütsü atema parnok masütsü atema tzü agi shitoktsüla. Yamaji parnoki masütsü atema parnok tetsüng tepen shitoktsüla, aser aji parnok asoshi, aser pa aser pa metsü atema parnok putusa putu asoshi özüng ka alitsü.
- Asenok dang tamalen Aadar card ya majung aser iba ya Mandatory masütsüla ta Aadar card ya kodang Mandatory kümdir Aadar card amshiba ajakji kechisudir suaka inyaksüla ta ni aiben Tiriyimiyim olem sapang nung zülüogo,
20. Dang Ajak nung Aadar Card kechisarina nung amshitsüla ta Özüng kumogo. Dang corona various atema Aadar number inoker, aser Prime Minister Narendra modi announcemen nung corona ya temer New world tenzüksü iba atemaji Aadhar lir ta shiogo. "New world worder" "one leader"
 21. One government" "one currency" one Religion" The coal of the "NEW WORLD ORDER." SOCIAL "INSTITUTION" ka dang asütsü. Iba corona ya new order ka dang asütsü. Ta ashir.
 22. Corona test asü dang aser viccine agidang Aadhar card kechiba agir?
 23. Ano PM Order kia jak nung corona test suyonga aotsü order Kechiba order agütsü? Test dang asü nung tashidak tali atoker.
 24. India nung viccine teimba agi aser nisung teimba asür?
 25. Viccine agirbo corona matoktsüla masüna? Kechi atema Ciccineji agi?
 26. By force agi ki shia semdanga test asütsübaji human right anema force agi viccine agütsüti ta asü nungbo (law) özüng anema human right anema asütsü, kodasür mobile Aadar mobile corona viccine tesendaktep ali ama pilemer.
 27. Khristantem asen tamang kong ali? Tsüngrem tuluba asü Corona tuluba? Tsüngrem tuluba asü, Viccine tuluba? Babylon sungyanglu ji Tuluba asü TAKÜM TSÜNGREMJI TULUBA? Daniel-Isungyanglu Külemtsü menangzük. Molusongzüi Daniel achitsü makokaja.
 28. Mi kangla agi Taküm Tsüngrem makoker. Corona agi Taküm Raküm Tsüngrem dak amanger dak mokongshitsü, kibubai asenok kumzüksü. Tsüngremi tazünger tamang ulujang Amen.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Canada nung Tenla ki 45 aser US nung Tenla ki pezü raksatsüogo



July 19, 2021 nü anepdang mesangwadang Canada nung British Columbia kübok Surrey nung St. George Coptic Orthodox Arogo Tenla ki meshi-meshia rongdoker aliba noksa nung angur.

July 28, 2021: Tawa Canada aser United States na nung Tenla ki aika rongdoktsüogo mesüra raksatsüogo, aser iba ya tamalen Khristantemi ketdangsuba school tem nung Canada nung lisopur tanurtem dak tim mesüi benshiba atema mangyangba lir ta aikati bilemer, ta International Christian Concern (ICC)-i metetdaksü.

Tawa Canada nung Tenla ki 45 raksatsüogo mesüra rongdoktsüogo; tang tesüsa rongdoktsüba Tenla kiji Canada nung British Columbia kübok Surrey nung Coptic Orthodox Arogo Tenla ki lir.

July 19, 2021 nü mejangjaba nisungtemi St. George Coptic Orthodox Arogo Tenla ki rongdokja liasü. Hombar anepongi 3:17 ako meta Tenla ki arongba osang police nem metetdaksü aser mi ensepba

mapang tashi nungbo Tenla ki meshimeshia rongdoker liasü.

Iba Tenla ki ya 1960 küm asüba lir, aser July ita tom nunga iba Tenla ki rongdoktsüba meranga liasü.

United States nunga Portland nung longkak aitertemi tesüiba ita ana tsüngda Catholic Arogopur Tenla ki pezü raksatsüogo.

Taoba ita osangbener den jembidang St. Francis of Assisi Church nung pastor, George Kuforiji-i, "Canada nung residential school tem nung tanur jenti aremba leper dak sendakba nung onoki shilem agia mali, ajisüaka ozü Arogo anema inyakba agi ni kanga mepelar," ta metetdakja liasü.

International Christian Concern Director of Advocacy, Matias Perttula-i, "Canada aser United States nung Tenla kitem

amakba ya anüolen yimsü anema nokdakba aser Khristan anema tesempa agi inyakba kanga bulua akümba temaitsü lir. Lenirtem aikati item tatalokba maitsüba atema mepelar, anungji teinyaktsü mapa aika lir. Tenla kitem rongdoktsüba agi kecha mebentetsü. Iba ya temenen mapa lir, aser iba ya ajanga tesempa taliba adoktsü," ta ashi.

Taoba mapang International Religious Freedom atema Ambassador, Sam Brownback-i, "Meimchir puti otsü nung Khristan yimsü anema inyakba putu tamajungbaji tan putu ya lir," ta tawa metetdakja liasü.

Tang alima nung yimsü nung ajemdaker reshikangshi tamajungba ajangshirtemji Khristantem lir; tang alima nung Khristan million 300 dak temabo reshikangshi tia nung lir.

Taküm India nung Khristantem anema inyakba tatalokba 145 liasü

July 28, 2021: Takük küm tenzüker ita trok tsüngda (January-June) India nung Khristantem anema inyakba tatalokba 145 liasü, ta Religious Liberty Commission of the Evangelical Fellowship of India (EFI)-i metetdaksü.

EFI indang "Hate and Targeted Violence Against Christians in India: Half Yearly Report 2021" ajanga ashiba agi, Khristantem anema inyakba timbaka tesempa agi inyakba liasü.

Taküm June ita tashi nung India nung yimsü nung ajemdaker Khristan asem tepsetogo, Tenla ki aser tekülem ki 22 amak aser Khristantem loktiliba nung sendokba tatalokba 20 liasü, ta kasa report ajangsa metetdaksü.

Khristantem anema inyakba tatalokba ken o timbaji Madhya Pradesh state (30) nung liasü; tanabuba state ji

Uttar Pradesh (ken o 22) lir. State anaprongla nung tawa anti-conversion ozüngtem yanglushiba sülen Khristantem anema inyakba kanga bulua kümogo.

EFI-i ashiba agi, linük nung Khristantem anema inyakba tatalokba aika liaka coronavirus wara nung ajemdaker police-i ken o magizük. Iba dak alia wara anema tenokdangba balala aliba agi meimchir temeden atema inyakertem sadoksadoka mesenzütetba den osangbenertemia item ama tatalokba osangtem report masü.

2014 küm India nung Khristantem anema inyakba tatalokba 147 liasü, ajisüaka takümbo küm tesadang kija nunga Khristantem anema inyakba tatalokba 145 liasü.

India nung Khristantem anema inyakba tatalokba 145 ya EFI-i bendenba kija lir, anungji iba dang nungjagi timba

alitsü.

May ita nung United States Department of State-i religious freedom report metetdaksüdang India nung religious freedom jenjang tamajungba akümba indang shia lir.

Tesüiba küm ishika USIRF-i India ya Country of Particular Concern (CPC) nung züngoktsü atema US State Department matsügang benoka arudar, ajisüaka US Dept.-i magizüker.

Iba report nungji Narendra Modi yimsüsüba kübok India nung nisung bendanga züngshiba, reshikangshiba aser religious minorities anema inyakba metetdakja lir.

ANOGO ABEN TSÜNGREM DEN

Telemtetba

Parnok chiyongzüker külen Yisui Simon Peter dang ashi, "Yona chir Simon, item dangi tali nai ni meimer asü?" Yohan 21:15.

Asenoki Pa tsüngdang tamakok angudang Yisui tesüngmangtsü lemanng ka nungi Pai agizüker! Pai asenok luja mejembir. Pai asenok maitsür. Asenok tesashiba tendangtsü asoshi asenok telemtetba akatsü Pai masüngdang. Iba melen Pai asenok ajar aser asenok Pa meimba akangshitsü Pai asüngdang.

Peter kodang nütsüngtem den atsüki nungi jena ao pai pa masterba tsüngdang kanga mejungi tamakok angu. Tesülen, pai yimjak nung pai Yisui magizük. Yisui kanga dang lendongpang nung alidang Peteri Yisui nütsüng ka sütet asübo ta pa süngmangseta alitsü.

Na küm tasen ka tenzükdang nai lemanng aisü nung Yisui tsüngdang tamakok nguogo ta sasa bilema alitsü südi. Na temulung lemtetta mesüi arur alitsü akok. Pai ne den jembiba nung nai tashi mangai arur alitsü akok. Ne taküm yimya nung Pa magizüki arur alitsü akok. Yisui Peter ajaba ama Pai na ajatsü. Pai na asoa mebilemtsü. Pai na mezüngmeshia masütsü. Pai ne dang nai Pa meimba meyipa repringshitsü asüngdangtsü. Pai Peter dang asüngdang, "Nai ni meimer asü?" Peteri ama, "Au, Kibuba" ta langzüra, Pai pa tenangzükbaba na asoshi akangshitsü. Nai atangji Pa meimra, nai Pa dang tashi angatsü (Yn. 14:15). Yisui ne tekümtetba menüngdaker, na bendanga agütsüshitsü menüngdaker mesüra iba küm merangshitsü nangzüksü menüngdaker. Yaküm nai Tsüngrem dang tashi angatsü renemba nung temulung lemtetta melitetti arua lira, iba jagi taküm küm takok mangutsü. Yisui ne temeim asüngdang. Nai atangji Pa meimra, iba küm ne mapa Pai aginüba ama alitsü.

Olympics repringdang Khristantem atema sarasademdaksüner: Open Doors

July 27, 2021: Open Doors- Khristan asübayong maneni i Khristantem dang, tang timtem ajurutsü," ta Open Olympics repringba mapang Doors USA Managing Editor, nung Khristantemi alima Lindy Lowry-i metetdaksü.

tesem balala nung "Atangji asenoki item linük reshikangshi tia nung aliba ajak bilemteta sarasademtsüla, Khristan adianutem atema kechiyong Tsüngremi item bilema parnok asoshi linük ajak atema mapa sarasademdaksüner, ta inyakdar. Talisa tang mezüng Iran linük nung Arogo kanga indar," ta laisa metetdaksü.

Meimchir temeden atema "India nung tasütait

Doors-i ashiba agi, tang Tokyo tamangertemi pei tamang Olympics nung linük 206-i shilem jenjang nungi matsüngshiba agidar, aser item linüktem aser Khrista osangtajung rongnung linük 49 bo lemsatepba ajanga Arogo Khristantem kanga maneni indar," ta lai reshikangshiba linüktem lir metetdaksü.

(Open Doors World WatchList). "Anungi taruba hopta ana

Iba dak sendakba nung nenoki Olympic Games Open Doors-i democratic repringba mapang nung item linüktem nung aliba linük 49 nung nenok kibong Khristantem dang tang alima züngsemtem (Khristantem) nung Khristantem atema sarasademjang, reshikangshiba linük 49-i kechiyong parnoki takok Olympics nung shilem agidar, korang atema maneni aser item linük nung asemdar," ta laisa shisem. Khristantem atema Tang alima nung sarasademjang, ta mepishi. Khristantem tamajungba reshikangshiba linük 10 ji: alima nung saisapongertem North Korea, Afghanistan, yimjung nung sabang ka nung Somalia, Libya, Pakistan, longjemba mapang nung asen Eritrea, Yemen, Iran, Nigeria adianu aser aianutsürtembo aser India linüktem lir.

OLONG PAITEP # 5889

1			2					3		
4							5			
						6				
				7						8
		9								
							10			
11							12			
13										

TIPLÉN		LANGTSÜNGLEN	
2. Teka mapa tajung	- (8)	1. Anepalua inyak	- (7)
4. Anakshinüba	- (5)	2. Teptsü	- (4)
5. Süoshi agi tazü	- (4)	3. Nok agi raratep	- (6)
9. Aria bilemtep	- (7)	6. Kibong aküm	- (4)
11. Ajemalu ozü	- (4)	7. Nüji masü	- (4)
12. Tzü an	- (5)	8. Taruba küm	- (7)
13. Teben teloktep	- (8)	9. Teka shidok	- (6)
		10. Meputep/Mapet	- (4)

OLONG PAITEP # 5888 TELANGZÜBA

TIPLÉN :		LANGTSÜNGLEN :	
1. Yimlibilem, 4. Anak, 5. Tangar,		1. Yongya, 2. Moko, 3. Marok,	
7. Aya, 8. Arong, 11. Par, 13. Lemjem,		5. Teronem, 6. Nung, 8. Amajok,	
14. Oagi, 15. Mulung.		9. Jangzü, 10. belem, 12. Rong.	



ALOKBA O SOPANGBA NA SENSAXSEMER :

Sobangsang : Temba, nabo kidang mamen yimdong nung dang ajurur ato.

Alokba : Ni mapa mali agi senzür.

Sobangsang : Mapa medeni tamangji tasü, na mulumi leni aotsü.

Alokba : Ni senzü agi dang chiyungtsü angur.

Sobangsang : Mapa meinyakerji jabujarir o meshimetsür na dang ato.

Alokba : Ni lanuwa nungi tetsür jilo dang jilor, aji agi takar akümer.

Sobangsang : Sürabang na takar kidang sema jajaba ya jabujarir asü?

Alokba : Masü, ni meshimetsür aser khen khen sen talang meshia kazür.

Sobangsang : Ohhh...Alokbabo jungdiba....

Lilir : I.Temjen Jamir

TANÜBO NAI LANGZÜANG

Q. ___ nung G20 Meeting for Environment ayongzüksü.

A. Italy B.EU C.India D.Brazil

===== (Taruba adok nung onoki langzüksü)

YASHI ADOK TELANGZÜBA : Chennai

AO OSHI ANGAZÜKDAK:
TANÜ ANGAZÜKTSÜBA OJANG

Kinren
(n) kin kidong tarensen (geneology)
* Asenoki asen jakzüka aruba **kinren** meteta alitsüla.

Kinü
(n) tanur sozükli,tila tanur (infant)
* Tanur **kinü** asüdang temang lema yutsütsüla.

Tepela Tasoba Anogo

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA?

OLYMPIC ASAYAMUNG NUNG KIJAI GOLD MEDAL TIEMTIBA ANGUR KAR :

Rank	Athlete	Nation	Sport	Year	Gold
1	Michael Phelps	United States	Swimming	2008	8
2	Mark Spitz	United States	Swimming	1972	7
3	Michael Phelps	United States	Swimming	2004	6
4	Kristin Otto	East Germany	Swimming	1988	6
	Vitaly Scherbo	Unified Team	Gymnastics	1992	6
6	Willis A. Lee	United States	Shooting	1920	5
	Matt Biondi	United States	Swimming	1988	5
8	Anton Heida	United States	Gymnastics	1904	5
	Michael Phelps	United States	Swimming	2016	5
10	Nedo Nadi	Italy	Fencing	1920	5

SUDOKU # 5929 TELANGZUBA # 5928

1			3	5			2	9	1	7	3	6	8	2	5	4	9
3		6	8				1		2	4	9	1	5	7	3	6	8
				9			4		5	6	8	9	3	4	7	1	2
9	6			4			3		3	8	7	5	2	1	6	9	4
5				9			7	1	4	9	1	8	6	3	2	7	5
		3		5	2	1	9	8	6	5	2	7	4	9	1	8	3
		4			8				7	3	5	4	1	8	9	2	6
	1				5				8	1	6	2	9	5	4	3	7
8		9		7				5	9	2	4	3	7	6	8	5	1

OJANG LUTEP # 5474

ENASI :

TNGRSÜEM :

SHIASO :

LIKU :

MTETESÜRA :

EMTETSÜ :

NGNU :

TSREÜNGMI :

ULKI :

MEETTSSÜTÜ :

OJANG LUTEP TELANGZÜBA # 5473

ASÜKÜM SHISATSÜ MAZÜOKTET INYAKERTEMJI PARNOK SASA TARUTSÜ LENMANG SHIBANGER ASÜTSÜ

TAN HOPTA ATEMA - KOMA SÜLA ?

Q.Nagaland nung Covid vaccination ya nisungtem teimba ka dak magii anen nunga koma süla ?

Democracy atema US aser India nati longjemer inyaksüla: Blinken



July 28, 2021 nü New Delhi nung India National Security Adviser, Ajit Doval-i US Secretary of State, Antony Blinken den senden amendang tangokba noksa nung angur.

New Delhi, July 28 (Agencies): US secretary of state, Antony Blinken-i India semdanga Bodhbarnü New Delhi tonga aruogo aser pai India External Affairs Minister, Subrahmanyam Jaishankar aser National security advisor, Ajit Doval na ajuruogo.

US ktdangseri India semdangba mapang nung India aser China na arrtsü tensa, US sepaitem ainshiba sülen Afghanistan nung security tensa mejungu akümba aser coronavirus tensa atema jembitsü.

New Delhi nung lokti lenirtem den senden amenba mapang nung Blinken-i, democracy amokmeren jenjang nung lir, anungji alima nung democracy linük tulutiba anati democracy tangatetba atema

longjemer nokdaksüla, ta ashi. Blinken-isa Tibetan lenir, Dalai Lama-a ajuruogo.

China linüki ambangyima inyakba mapang nung US aser India nati tayongzükba balala anema nokdaksü, ta bangjemer aliba mapang ka nung US ktdangseri India semdangseri.

Defence secretary, Lloyd Austin-a tang Asia nung lir.

Blinken-i democracy atema jembiba dak sendakba nung China yimtiba, Beijing nung osangbenertem den jembidang Chinese foreign ministry otongdar, Zhao Lijian-i, "Democracy ya meimchir ajak atema kasa senti. Iba atema linük shinga dak jurila tashi mali," ta metetdaksü.

Yimjung ken o ajanga mangatettep ken otem bentettsü atema China-i

memelunger, ta shia Mongolbarnü Singapore nung Austin-i, "India anema inyakba-a asenoki nguogo, Taiwan nung anema inyakba aser Xinjiang nung Uyghur Muslim nung jenti tepsetba aser meimchir temeden anema inyakba asenoki meteta lir," ta metetdakja liasü.

Region nung China-i ambangyima inyakba sülen tesüiba küm ishika tsungda US aser India na tesendaktep kanga junga kümogo.

Tawa acting assistant secretary of state for South & Central Asian Affairs, Dean Thompson-i, Blinken-i India semdangba mapang nung pai India nung ktdangsertem den meimchir temeden aser democracy onüktem jembitsü, ta metetdakja liasü.

Tsürabur 48%-i tanur vaccine magi tashi school-i yoktsü memelunger

New Delhi, Chiteni/July 28 (Agencies): India nung tsürabur shilem 48-i pei chirnurtem coronavirus vaccine magi tashibo school-i yoktsü memelunger, ta survey tasen ka ajanga bushitetogo. Iba survey nung India tesem ajungalen district 361 nungi tsürabur 32,000 dak temai shilem agia liasü.

Tsürabur shilem 30-ibo par district nung coronavirus agi shiranger ka danga melira tanur school-i yoktsü melunga lir, ta telangzüba agütsü.

Online platform, Local Circles-i iba survey agia liasü, aser parnoki ashiba agi, "Tanurtem school-i yoktsü

atema taruba itatem nung vaccine agütsübaji kanga tongtiba asütsü, kechiyong tsürabur shilem 48-ibo tanur nem vaccine magütsü tashi school-i yoktsü memelunger."

"Ajisüaka tsürabur shilem 21-ibo, kodang school tanaben lapokdir parnoki tanur school-i yoktsü melunga dang lir ta shiogo," ta kasa survey ajanga metetdaksü.

Mongolbarnü Union Health Minister, Mansukh Mandaviya-i BJP MP tem dang, kobi melii tanurtem nem coronavirus vaccine agütsü tenzüksü, ta metetdakja liasü.

India nung coronavirus wara

prok tenzükba sülen yaküm March ita nungi tenzuka linük tesem ajaklen school tem shibanga liasü.

Yaküm October ita nung state aika nung school tem lapoka liasü, ajisüaka linük nung ano tanaben coronavirus prokba sülen school tem shibangtsü tuyu.

Tang Gujarat, Maharashtra, Uttar Pradesh, Haryana, Madhya Pradesh aser Bihar nung school karbo lapokogo aser Rajasthan, Himachal Pradesh den Andhra Pradesh state temia August ita tetenzüklen nungi school lapoktsü, ta sangdongogo.



New Delhi, July 28, 2021: Pegasus spyware ken o dak sendakba nung Bodhbarnü Congress Party lenir, Rahul Gandhi den opposition party balala nungi lenirtemi osangbenertem den jembiba noksa nung angur.

Pelaba Lemsateper

"Kechiaser ni asoshi taküm alibaji Khrista, aser tasübaji tajangzük lir" - Filipi 1:21



Onoki teti meima aliba Ojala **Maongsangla** (Changdang) la iba akümüli wadang temer Kibuba den alitsü aoba anogo 17/07/2021 nung kija. kibong, kiyonger, tembartem, Kohima Ao Baptist Arogo, Mongchen Senso, Changdang Senso, Government Department balala nung külemi inyakerem, Lower Agri/Forest Colony Youth aser Councils, nenok kwikati ozü asüko mapang nübo, rongsen, tamang sarasadem, shisatsü aser temeim agi ozü dang sayua nungita yariogo, ozü-i nenok ajak dang pelaba lemsateper.

Nenok mapa tajung asoshi teyanglur Tsüngremi moajangma ta ozü sarasadem.

Temeim Kinungbo, Chirnurtem, Semchirtem, Kinunger aser Anükapang.



New Delhi, July 28, 2021: Bodhbarnü Main Committee Room, Parliament House, New Delhi nung 'World Hepatitis Day' anogomong nungtem nung ayongzükba seminar ka nung Union Health Minister, Mansukh L Mandaviya-i jembidang tangokba noksa nung angur.

Pegasus: Parliamentary panel-i IT aser MHA ktdangsertem jaok

New Delhi, July 28 (Agencies): Pegasus spyware ken o dak sendakba nung Congress lenir, Shashi Tharoor-i aniba Parliamentary panel kati Ministry of electronics & information technology aser Ministry of home affairs ktdangsertem jaokogo.

Tang India nung Pegasus spyware ken o dak sendakba nung mangatettep tulu adoka aliba mapang nung Shashi Tharoor-i iba ken o bushisüngdangtsü atema Supreme Court judge teinyakdak ka leniba nung judicial-i bushisüngdangtsü akhanger.

Bodhbarnü osangbener den jembidang Shashi Tharoor-i, "Onok tebilemba onük kar lir: Sensotem data privacy aser security den cyber security lir. Item onük kübok 'Pegasus Project' ken otem aiter. Sorkar secretary tem dang tasüngdangba akatsü atema standing committee dak temeden lir. Onoki Supreme Court judge teinyakdak ka

leniba nung Judicial-i bushisüngdangtsü akhanger," ta metetdaksü.

Congress Party-i Pegasus ken o bushisüngdangtsü atema sorkari joint parliamentary committee ka tentettsüla mesüra iba ken o bushisüngdangtsü atema Supreme Court judge ka shimtsüla, ta akhanger.

Tawa International media-, sorkar agencies dang ang ayokba Israel nung spyware ka amshia India nung nisung 300 dak tema phone ajanga itangiter asütsüa akok; aser parnok rongnung tang teinyakdak minister ana, osangbener 40 dak tema, tongtibang opposition lenir asem, Supreme Court judge ka, shishilembartem aser India nung activist tem aika indang phone numbers densema lir, ta metetdakja liasü.

Nisung 300 dak tema nungji Congress lenir Rahul Gandhi, election asalentong yanglur mongin, Prashant Kishor aser Union IT Minister Ashwini Vaishnav nung densema lir.

Sydney nung COVID-19 lockdown atsülangogo



Gladys Berejiklian

Sydney, Chiteni/July 28 (Agencies): COVID-19 cases maneni zünba ajanga Sydney nung lockdown benoka aliba ano ita ka atsülangogo.

Australia kübok yimti tulutiba nungya Delta variant poktetba mechi June ita tatemlen nungi nübürtem kimai madoktsü totuyuba tem agüja lir.

Taküm iba tashidak yagi Sydney nung nisung 2,500 dak tema menaogo.

New South Wales, kong Sydney ya yimtiba lir, yangji Bodhbarnü nisung tasen 177 dak COVID-19 tashidak puteta liasü, koba 2020 March ita sülen anogo ka nung timtiba putetba alitsü.

New South Wales Premier Gladys Berejiklian-i ashiba agi, sentong yanglua aliba ama yimti ya Hokulbarnü lockdown nungi mesalatet.

Lai ano nübürtem senzüsempingba maneni alentsü sangdong aser yangji

nüngdakba osettem kilometer 10 telungzük nung dang shishitsü dena lir.

Victoria aser South Australia nunga iba tashidak wara tera pokteta aliba azüoktetba sülen lockdown tem Bodhbarnü agiena liasü.

Sydney nung alir nisung million pongu ya taküm tashidak wara mepoktet tashi akhi ama lia aru.

Iba tashidak wara tenzük mapang talangka arrtsü shibanga ayu aser bendanglen nungi arurtem hotel nung quarantine asütsü totuyuba agüja Australia nung tashidak menatepa aoba kanga junga azüoktetba liasü.

State sorkartemi iba tashidak prokshia aoba azüoktsü mechi yimitem arrsanga shibang aser kanga sashia tsüngsü pua liasü.

Taoba küm lockdown ya terben dak tema sangdonga liasü. Saka Sydney nung tenokdangba ya September mesüra iba dang nungi talila

atsülangtsü akok, ta mongintemi ashir.

Tashidak menatepa aoba jenjang ya ajema mekumdaktsü tashi shibanga aliba melapoktettsü, ta ktdangsurtemi ashir.

Taoba hopta putetba cases tem rongnung nisung asem nungi ka community nungi liasü. Aser itemji tongtipang mapa inyaker aser jang-o-tzü shishiba nungi liasü.

Police tem tanükba yoka lockdown benokba ajanga tesem kar nungbo nübürtem kanga mepelai akum.

Hopta tatemlen nisung meyerijang aika Sydney, Melbourne aser danga yimitem nung "freedom" nungja agütsür longkak aita liasü.

Iba ya ajanga linük nung COVID-19 mozü agütsüba sentong nung takok mongutetba temai adoka sayur, koba February ita tenzuka liasü.

Australia nung aliba lanurtem shilem 16 dang COVID-19 mozü ya agia lir.

Mozü agir ajema aliba ya federal sorkari Pfizer mozü talila malizüketba ajanga lir, ta aikati aitsür.

Ajidang masü parnoki AstraZeneca mozü nung tamang kateta aliba kar dak azü telung tendaktsütsü akok ta osang temai adokba ajanga mozü agir ajema akum.

Linük ktdangsurtemi tawa Sydney nung AstraZeneca mozü agütsü ajungshia lenmangtem sayua liasü.

Linük nung sorkari COVID-19 tashidak wara junga ktdang masüba asoshi ita aika nübürtemi aija arur taoba hopta Ato Kilonser Scott Morrison-i tatok meshia liasü.

Tanzania Tir Hassan-i COVID mozü agia vaccination drive tenzük

Dar-es-Salaam, Chiteni/July 28 (Agencies): Tanzania Tir Samia Suluhu Hassan-i yimjak nung COVID-19 mozü agia linük tesem ajungalen iba mozü agütsüba maparen tenzükogo.

Bodhbarnü Hassan mozü agiba ya mera tuluka alitsü, kechiaser la jakdang tir inyaka alisangi iba tashidak wara ya temolung shishia magizük.

Taoba Tir John Magufuli-i nübürtem dang COVID-19 mozü magütsü nübürtem dang tekumdangtsü ashi aser tzüsem tatsük astioka kidang anepalutsü ajungshia liasü. Pa March ita sür Hassan-i melenzükba sülen sorkari COVID-19 ktdangsuba melenshi aser tangbo ktdangsurtemi kima-yimtong nung mask agütsü aser tetsüngta ayutsü ajungshir.

Hassan, shiba Johnson & Johnson mozü agi, lai mozü dak temolung lemtetba ashi aser nütsüng yongsük million 58 dak tema aliba linük nung mozü agütsüba maparen tali inyaktsü ashi.

"Linük nung mozü agütsü janrartem peria mozü anepalutsütsü," ta Hassan-i Dar-es-Salaam yimti nung yimjak nung mozü magi tsüngta shia liasü.

Maka-mait linüktem nem United States-i COVAX global initiative kübok coronavirus mozü dosen million ka dak tema agütsütsü Honibarnü sangdonga liasü.

Iba campaign tenzükba sentong nung Health Minister Dorothy Gwajima-i iba mozü atema osang tiazü prokshiba anema nübürtem nung shisatsü agütsütsü maparen tenzüktsü nanzük.

"Iba COVID tashidak madak takok angutsü hadir ji

mozü ya dang lir aser iba yagi polio aser danga tashidak ama samatsütsü," ta minister-i ashi.

Evangelical arogo nung lenir aser tang yimsü tesüdak CCM party nungi ozüng yanglur Josephat Gwajima-i taoba hopta COVID-19 mozütem mezüngmeshia jembiba ajanga aika jashitepa liasü.

Hassan den ato kilonser, chief justice aser danga lenirtem iba mozü ya agi aser nübürtem dang iba mozü nung tetsübuttsü kecha mali, ta shia liasü.

"Ni kü takum agütsütsü... Nübürtem asoshi tatishitsü tajung yutsüner," ta lai ashi.

Tanzania nung küm ka dak jia COVID-19 tashidak jangjatetba indang osang mesangdongi arua liasü, saka tangbo Africa Centers for Disease Control and Prevention (Africa CDC) nem data agütsür aser Bodhbarnü tashinung cases 858 liasü.

Ajisüaka Tanzania nung COVID-19 agi meneper ya iba dang nungi kanga agi timba alitsü, ta aikati ashir.

Hassan-i mozü yangluba maparen nung temolung agütsütsü nangzuka liasü, ta Africa CDC ajanga ashi. Mongulbarnü lai agency indang director John Nkengasong ajurua liasü.

Africa linüktem nung mozü yangluba sentongtem tali tenzüktsüla, ta tang angateta arur.

Africa kübok Burundi aser Eritrea nung ano COVID-19 mozü agütsüba maparen metenzük lir.

Burundi nung asür Tir Pierre Nkurunziza-i iba tashidak wara mezüngshiba asoshi aija aru, aser yangji tang tashi mozü menüngdaker, ta ashir.

China ktdangsur aser Taliban lenirtem ajurutep

Beijing, Chiteni/July 28 (Agencies): China indang foreign minister-i Taliban lenirtem telok ka ajurua Afghanistan nungi United States-i anir aliba bendanger sepaitem ainshiba mapang tesendaktep yangluba temaitsü sayur.

Yimjung nung Afghanistan lungjemshiba aser yanglushiba maparen nung Beijing-i tongti shilem agütsü imlar, ta Wang Yi-i Taliban telok nungi teshimtet nisung toku dang Bodhbarnü shia liasü. Taliban telok nungi China semdangertem

rongnung iba telok indang co-founder Mullah Abdul Ghani Baradar densema liasü.

Taliban-i East Turkestan Islamic Movement anema mera karbo agütsü imlar, kechiaser parnok ya China national security atema timtem lir, ta pai ashi. Iba telok ya China anüolen Xinjiang region nung kanga yakyaka



lir, ta China-i ashir. Telungpur temi kidanger linük, Afghanistan ya amshia azüdokshi mapa inyaktsü akok, ta Beijing-i ashi.

US-i anir aliba bendanger sepaitem Afghanistan nungi anizüker aoba maparen tatemleni aruba mapang ka nung May ita nungi tenzuka Taliban-i Afghanistan tesem

aika agiyonga arur. Iba linük nungi bendanger sepaitem ya August ita tatem tashinung anizüker omatsü sentong lir.

Afghanistan sorkar meyong sepaitem den raraba ajanga civilian asü-amar jenti akum aser ano nübürtem tesem balala nung prokshi.

Kasa mapang Taliban lenirtemi tawa linük balala

den tesendaktep yangluba maparen tenzuka arur.

Bodhbarnü China nung Tianjin yimti nung senden amenba ya China nung ktdangsurtemi jaokba lir, ta Taliban odongtar Mohammed Naeem-i ashi.

Iba senden nung yimtenren, rongsenketzüng aser linük ana indang security

dak sendakba ken o aser Afghanistan nung tang tensa aser yimjung maparen atema jembishinüa liasü, ta Naeem-i Twitter nung zülutsü.

"Ainertemi China dang shinga nema Afghan li amshia China anema mapa tamajung inyaksangshi mesüdaktsütsü ashi," ta Naeem-i ashi.

"China-ia Afghan den maneni bendanga agütsür yariteptsü tebilemba lemsatet aser Afghanistan yimtenren nung teka mamoshitsü saka linük nung tebilemstü khuret kokteta yimjung bener arudaktsüba nung yaritsü."

Afghanistan nungi US sepaitem anizüker aoba ya tajangzük ka ama Beijing-i bilemer, aser Kabul nung tarutsü sorkar den tesendaktep yangluba ajanga Belt and Road Initiative ya Afghanistan aser Central Asian linüktem tashi renloka aotsü atema lenmang lapoktsü.

(Maneni tapak 10 nung...)

Changtongya RD Block-i Workshop ka ayongzüka agi



Dimapur, Chiteni/July 28 (TYO): India nüjiso ngur küm 75 ajungba nungtem nung Deendayal Antyodaya Yojana - Nagaland State Rural Livelihoods Mission (DAY-NSRLM), Block Mission Management Unit, Changtongya RD Block aser H&FW Dept na longjem FSSAI (Food Safety and Standards Authority of India) licence certificate for SHG producer members dak sendakba nung July 28 nü Changtongya jila nung Workshop ka ayongzüka agiogo. DAY-NSRLM-i sangdong ka ajanga ashiba agi, SHG tem indang product tem

shishilembadak kecha tetsükdaktsü makai shishilembatetsü atema food safety & quality standards sülen anidaktsü aser FSSAI nung züngoksemtsü atema SHG züngsemtem nem tangazükba agütsüsü nükjidong nung iba workshop ayongzüka agi. Iba workshop ya Block Program Manager, Changtongya RD Block, Moanungsang lenisüba nung agi aser Food Safety Officer Mokokchung Zone, Department of Health & Family Welfare, Sukumlo Yanthan-i FSSAI nung züngoksemtsü kodang tongtibang aser tajangzük lir, iba indang SHG

züngsemtem nem metetdaktsü. Iba sentong nung Assistant District Program Manager Mokokchung Moatoshi-ia shilem agia liasü. Maneni FSO Sukumlo Yanthan-i, FSSAI nung züngoksemba ajanga products tem tajungba yoktetsü, talirtemi tamang katetsü aser talirtem chiyongtsü tamajung nungi pilaa toktsüsü, ta ashi. Workshop sentong tembangba sülen SHG züngsemtem online ajanga FSSAI nung züngoksemja liasü. Mokokchung District kübok Blocks 9 nung SHG 105 nungi züngsemtem FSSAI nung züngoksemogo.

Zunheboto nung "World Hepatitis Day" amung



Dimapur, Chiteni/July 28 (TYO): District Health Society, Zunheboto-i July 28 nü CMO Office nung "World Hepatitis Day" sentong ka ayongzüka agiogo. Iba sentong ya "Hepatitis can't wait" omen nung ajemdaker agi liasü. "World Hepatitis Day" anogo ayongzüka amungba indang jembidang Dy.CMO, Zunheboto Dr. K. Akaho Sema-i, World Hepatitis Day ya viral hepatitis, koba ajanga temesen kanga mejungi raksatsür aser hepatocellular cancer adokdaktsür, iba indang tangazükba agütsüsü nükjidong nung küm shia July 28 nü ayongzüka amunger, ta ashi. Hepatitis dak sendakba tashidak agi alima nung second 30 shia nisung kaka asür ta shia pai tang amala COVID-19 wara pokteter aliba mapang nunga

viral hepatitis ya sentoka metoktsüsüla, ta ashi. Paisa, hepatitis virus ya tapu pongu lir; A, B, C, D aser E ta ashi. Hepatitis B aser C ya kanga bulua adoker aser alima ajunga nung nisung million aikadak kongshir, koba ajanga acute (short-term) aser chronic (long-term) temesen tashidak adokdaktsür. Viral hepatitis ajanga küm nung nisung million ka dak tema asür, ta Dr. K. Akaho-i ashi. World Hepatitis Day ya tang tashi nung terenlok kechisa lir item ajak benjungsü aser tang alima nung tetsükdaktsütem den raratsü nükjidong nung ayongzüka amunger. Kasa mapang nung tashidak dak sendakba nung tangazükba agütsüsü aser tashidak nokdangtsü, diagnosis aser treatment dak sendakba nung

yimden yimsüsüba tsütsü temelenshi ka bener arutsü atema ajungmesotsü atema iba ya maongka tajung lir, ta pai ashi. Maneni iba anogo ya asen taküm nung hepatitis jengang jangjaa alitsü koda tongtibang iba indang tangazükba agütsüsü aser treatment dak sendakba nung osang prokshitsü mapang tajung ta Sema-isa ashi. Iba sentong ya DTO cum DPO (RCH & UIP) Dr. Aron lenisüba nung agi aser DVBO/DSO, Dr. J. Hokugha-i lokti pelaa agizükbo o jembia liasü. Sentong nungsa Vitoli, DPM-i tepela anküp o jembia liasü. "World Hepatitis Day" sentong nung Medical ketdangsurtem, Physiotherapist, Psychiatrists, BPM, Counsellor aser ASHA Coordinator temi shilem agia liasü.

**Office of the
AKHOYA SHISALUYIMER TELONGJEM**

TENÜNGSANG AGÜTSÜR

Akhoya Shisaluyimer Telongjem ajanga asen züngsem **Sp. Alemkaba Jamir**, S/o Lt. Senakumba Jamir aser Wt. Imsumongla, Kohima Science College, Jotsoma nungi B.Sc (Honours) Statistics nung Gold Medal ngua asen shisaluyimer telongjem nem konang tulu bener arutsü nung kanga pelar aser tenüngsang agütsür.

Iba den külemi taküm 2021 HSLC, HSSLC aser U.G tatidangtem nung züngsem tajung shirnokisa takok nguogo, nenok ajak dang kangasa pelar aser tenüngsang agütsür. Tarutsü nunga maneni züngsem ajaki takok tajung ngutetsü asen AST teyimla aser sarasadem.

**Sd/-
Sp. Satemmongba
President, AST**



**Sd/-
Kr. Chubakokla Lkr
Gen. Secretary, AST**

**Office of the
Mopungchuket Ait Laishir Telongjem**

KHONANG TETUSHI AGÜTSÜR



Kr. Ochien



Sp. Imsüwaden Ozükum

1. Wb. aser Wt. Tajenmeren Jamir jala **Kr. Ochien**, lai HSLC exam 2021 St. John Hr. Sec School Dimapur, nungi tematiba jenjang 12 (e) buba nung takok anguba asoshi tenüngsang agütsür.
2. Wb. Meyimangyang Ozükum jabaso **Sp. Imsüwaden Ozükum**, pai HSSLC exam 2021 Clark Memorial Higher Secondary School Impur, nungi Ao Subject nung tematiba jenjang ngutetba asoshi tenüngsang tulu agütsür.

Maneni iba den kaketshir shirnokisa taküm HSLC aser HSSLC exam nung takok tajung nguogo, nenok ajak nem tenüngsang agütsür. Asen Teyanglur Tsüngremi maneni tarutsü nunga nenok azüngba wadang balala anung takok tajung ngudakjang ta asen Kaketshir Telongjem tamang sarasadem.

**Sd/-
Imtilong
President**

**Sd/-
Longsen
General Secretary**

Nokyan yimtsüng nung ODF Plus sustainability sentong ka agi

Dimapur, Chiteni/July 28 (TYO): ODF Plus sustainability dak sendakba nung PRA inyakyim ka Noklak District kübok Nokyan yimtsüng nung July 27 nü ayongzüka agiogo. Iba sentong ya DWSSM, PHED Tuensang-i ayongzüka aser WSSO PHED Nagaland-i senotsü teyari agüja liasü. Sentong nung IEC Consultant, DWSSM PHED Tuensang, Fairyson Sangtam-i, open defecation free status ya yimyayimpong melenshiba dak sendakba nung maneni tongtepratepa aliba ajanga ajangzükettsü, ta ashi. Paisa, ODF status mesamadaktsüii

bener aotsü atema SBMG indang tongtibang onüktem lemsatep. Kasa mapang nung Er. Khaoshai Lam, SDO PHED Noklak-i, Grey water management, kilenshia nung aser lokti nung soak pits aser leach pit amala yanglua amshitsü koda tongtibang iba indang lemsatep. Paisa, metsümeshidak amentepba yimya aser black water aser faecal sludge anepaluyim indang lemsatep. Iba sentong nung Village Council, WATSAN, Swachhagrahi, Anganwadi/Health worker tem dena liasü.

Tuensang nung topper tem nem tetushi agütsü

Dimapur, Chiteni/July 28 (TYO): Beti Bachao Beti Padhao, Tuensang kübok District Administration aser Mahila Shakti Kendra, Tuensang na senteper July 27 nü DC conference hall, Tuensang nung HSLC topper tem nem tetushi agütsüba sentong ka ayongzüka agiogo. Deputy commissioner Tuensang, Kumar Rammikant, IAS-i, topper tem nem

tenüngsang agütsüba den tetsükdaktsü aika ajangshiaka pei nükjidong matong tashi maneni meranga inyaktsü ajungshi. Pai, topper ana, subject topper asem aser subject tesayurtem nem senpet den kuli kakets agüja liasü. Kasa mapang nung Women welfare officer, Mahila Shakti Kendra, Songmao M-i, BBBP sentong indang lemsatepa liasü.

Tokyo Olympics: Rani, Sindhu aser Deepika nungeri takok nguogo



Chiteni/July 28, 2021

(Agencies): Bodhbarnü boxer Pooja Rani (75kg)-i Algeria tsür Ichrak Chaib koka quarterfinals-i iogo. La tang mezüngbuba Olympic nung shilem agidar.

Arishi küm 30 tain India tsür la yagi iba asaya 5-0 agi koka liasü.

Asian champion anaben tashi koker aliba asayar yagi tetenzük nungi asaya amokbanger asaya aser round asemprongla nung Chaib nem kecha maongka magütsü asaya liasü. Chaib-a tang mezüngbuba Olympic nung asayaa liasü.

Kasa asayamung nungsa India tsürtem rongnungi nungtugu badminton asayar P V Sindhu-i tetsür kija asaya Group J nung Hong Kong tsür NY

Cheung koka pre-quarterfinals-i iogo.

Arishi küm 26 tain Sindhu, shibai Rio Olympics nung silver medal ngua liasü, lai world No. 34 Cheung 21-9 21-16 agi koka par telok nung temaba jenjang nung group asaya tembang. Sindhu aser Cheung na tang tashi nung trokben asayaogo aser trokbenprongla Sindhu-i kokogo.

Quarterfinals nung Sindhu Denmark tsür world number 12 Mia Blichfeldt den asayatsü, shiba Group I nung temaba jenjang nung tembanga liasü. Sindhu aser Blichfeldt na tsüngda asaya Sindhu-i pezüben aser Blichfeldt-i khen ta koka lir. Taküm küm tetenzüklen Yonex Thailand Open nung Blichfeldt-i Sindhu akok.

Ajisüaka tebur kija asaya nung India nung asayar B Sai Praneeth Group D asaya tatembangbuba nung Netherlands nung asayar M Caljouw-i kokogo.

Mongolbarnü India nung tebur tarep asayar Chirag Shetty aser Satwiksairaj Rankireddy nata tsükogo. Tenati parnok telok nung asaya anabo akok saka quarterfinals nung asayatsü atema qualify mesütet.

Maneni Bodhbarnü World number one archer Deepika Kumari-i tetsür kija asaya nung US tsür Jennifer Mucino-Fernandez 6-4 agi koka pre-quarterfinals-i iogo, aser iba ajanga archer nung India nung atema medal akoktsü timla mesami lir.

India nung nungtugu Badminton asayar Nandu Natekar süogo



Chiteni/July 28, 2021

(Agencies): India nung rongnungi 1956 küm mezüngbuba international title ka akoksang nungtugu badminton asayar Nandu Natekar Bodhbarnü süogo. Pa arishi küm 88 liasü. Pai pa indang career nung national aser international titles 100 dak tema kokogo.

Nandu-i par jabaso Gaurav aser jala ana toktsür iba lima nungi pilaogo. "Pa kidang tesunep nung amozükaogo. Onok ajak pa den liasü. Pa taoba ita asem tashi temang mejungi lir süogo," ta Gaurav-i PTI dang ashi.

Natekar ya par mapang nung asayatem rongnung kanga nungtugu liasü aser pai World number three tashi tongteta asayaogo. Pa Maharashtra anüolen Sangli tesem nung aso. Natekar-i küm 15 dak tema asayaba mapang national aser international titles 100 dak tema kokogo. Maneni pa nem 1961 küm tetushi Arjuna Award dena agütsüogo. "Temulung korema kübok

Nandu Natekar July 28, 2021 nü asüba osang lemsateper," ta Natekar'er kinungertemi sangdong ka ajanga metetdaksü.

"COVID-19 tetuyuba temulungdang yur asüpila sentong ayongzuka magitsü. Pa atema sarasademjang," ta parnokisa ashi.

Natekar asayaa aliba mapang 1954 küm All England Championships quarterfinals tonga asaya aser 1956 küm Malaysia nung Sellanger International asayamung akokba sülen pa India nung rongnungi international asayamung ka akokba mezüngbuba asayar aküm.

1951 aser 1963 tsüngda pai India team nungi Thomas Cup nung kija asaya 16 nungi 12 akok aser tarep asaya 16 nungi 8 koka liasü. Pa lenisüba nung 1959, 1961 aser 1963 küm India team iba asayamung nung asayaa liasü. Paisa, 1965 küm Jamaica nung Commonwealth Games asayaba mapang India tenüng nungi asayaa liasü.

Raphael Varane alizüktsü mulungtepogo: Manchester United

Chiteni/July 28, 2021 **(Agencies):** Manchester United-i Mongolbarnü, Raphael Varane alizüktsü atema Real Madrid den mulungtepba sangdongogo.

French club Lens nungi 2011 küm Real Madrid nung arua adenba sülen Raphael Varane-i asaya 350 dak tema nung shilem agiogo aser Real den La Liga titles asem aser Champions League pezü kokogo.

Mongolbarnü United sangdong ka ajanga, "French international defender aser

World Cup koker aliba asayar Raphaël Varane alizüktsü atema Real Madrid den tangatettep ka dangi aruba Manchester United-i pelashishia sangdonger," ta metetdaksü.

United-i pound million 34 agi Real Madrid nungi France nung center back ya alizüktsü atema mulunga agizükogo, ta British media-i Hombarnü metetdaksü.

Italy nung osangbener Fabrizio Romano-i ashiba agi, Varane iba hopta tatemi

England-i aotsü aser quarantine asüba sülen pa temang tendangtsü aser 2025 June ita tashi United nungi asayatsü aser ano 2026 June tashi asayatsü atemaa lenmang sadema lapoka yur tenangzüktepba ka yanglutsü mulungtepogo.

Kasa mapang nung 2018 küm France-i World Cup akokba team nung Varane densema liasü aser taküm European Championship nunga pa France team asaya pezüprongla nung asayaogo.

China ketdangsür aser... (Tapak 8 nungi...)

"China-i Afghanistan linük telungzük inyakyim nung shilem magitsü atema kanga junga asadanger inyaksangshia arur... Afghanistan ya Afghan nübür meyong lir," ta China foreign ministry indang odongtari Bodhbarnü ashi.

US Secretary of State Antony Blinken-i India semdangba mapang, sepaitemi Taliban ya mazüoktetra Afghanistan ya taochitsü linük ka akumtsü, ta Bodhbarnü tekumdangtsü ashi.

"Taliban-i linük balala den tesendaktep yanglutsü meranger ta ashir, Afghanistan atema linük balala nungi teyari aginer. Parnok lenirtemi sadoksayima alima nung senzüner aser tenokdangba tem agienner amai ajiteter," ta pai osangbener dang ashi.

"Tashiyim amshia linük agiba aser yangji aliba nübürtem indang tashi temeden tim masüba nung amshiba ya nükjiding ataloktetba lenmang masü."

Kasa mapang Afghanistan Tir Ashraf Ghani-i linük balala dang Taliban aser par busemer tejangraba meyipa reprangshitsü ajungshia liasü.

"Tensa aser nükla tsütsü dangari asenok amaker, koba taoba küm 30 tsüngta majangshidak," ta pai Bodhbarnü sangdong ka nung ashi.

"Item ya 20th century mapang aliba Taliban masü...saka kiralongrar tesendaktep melenshiba aser mapa tamajung inyakba lokti tentet melentepba tetsüngta nung lir," ta pai ashi.



Tokyo Olympics artistic gymnastics asaya nung Russia tetsür team tabelen nungi Lillia Akhaimova, Viktoriia Listunova, Angelina Melnikova aser Vladislava Urazova nungertemi gold medal anguba sülen tangokba noksa nung angur.

BILEMDANGANG
 "Na meketa alirtem jashia tetoktsü;
 Na aolen ajak nung temeim prokang."